



Komunikadu Imprensa
28 Fevereiru 2022

Emas ho defisiénsia la asesu ba kartaun eleitorál sai kestaun iha Semináriu Rejionál ne'ebé JSMP organiza iha Rejiaun Otónomu Oekusi

Iha 16 Fevereiru 2022, JSMP realiza semináriu rejionál kona-ba demokrasia, knaar orgaun soberanu, partisipasaun públiku iha prosesu halo lei no asesu ba justisa formal, iha Rejiaun Otónomu Oekusi.

Semináriu ne'e ho objetivu atu fasilita oinsa públiku, liuliu xefe suku, membru konsellu suku no membru comunidade sira ne'ebé antes ne'e tuir ona formasaun ne'ebé fasilita husi JSMP no partisipante sira balun foin partisipa iha semináriu ne'e atu hasoru direktamente ho autór judisiáriu sira hanesan juis, prokuradór no defensor hodi hato'o sira nia hanoin, preokupasaun, krikita no rekomendasaun sira ba autór judisiáriu sira ne'e.

“Ho atividade semináriu rejionál ne'e, xefe suku, membru konsellu suku no comunidade sira bele rona esplikasaun direktamente husi autór judisiáriu sira kona-ba sira nia knaar no iha tempu hanesan partisipante sira mós iha oportunidade hato'o direita preokupasaun, komentáriu no rekomendasaun sira kona-ba serbisu justisa nian,” dehan Sra. Ana Paula Marçal, Diretora Ezekutiva JSMP.

Oradór ba semináriu ne'e mak Meritísimu Juis Administradór Tribunál Distritál Oekusi , Dr. Hugo da Cruz Pui, ne'ebé apresenta kona-ba knaar Tribunál/juis iha adminisitra justisa tuir Konstituisaun no lei sira ho nia susesu, progresu no dezafiu. Dignísimu Xefe Prokuradór Distritál Oekusi, Dr. Mateus Nesi, apresenta kona-ba knaar Ministériu Públiku/prokuradór iha representa vítima feto no labarik sira tuir Konstituisaun no lei sira ho nia susesu, progresu no dezafiu. Exelénsia Koordinadór Defensoria Públiku Distritál Oekusi, Dr. Calisto Tout, apresenta kona-ba knaar defensoria públiku iha fornimentu assisténsia legál ba ema kbiit laek tuir Konstituisaun no lei sira ho nia susesu, progresu no dezafiu no Sra. Ana Paula Marçal, Diretora Ezekutiva JSMP, apresenta kona-ba progresu no dezafiu serbisu Parlamentu no Tribunál nian tuir JSMP nia rezultadu monitorizasaun.

Kestaun balun ne'ebé partisipante sira foti iha semináriu ne'e mak karau tama toos no toos na'in taa mate tiha karau refere, apalidu ba oan ne'ebé aman abandona, emas ho defisiénsia sira ne'ebé kartaun eleitorál no sidadaun estranjeiru ne'ebé hela kleur ona iha Timor Leste maibé susar atu hetan direitu ba sidadania.

Hatan ba kestaun karau tama toos no toos nain taa mate tiha karau refere, Meritísimu Juis, Dr. Hugo da Cruz Pui esplika katak tuir loloos dalan la'os taa mate karau maibé fó hatene ba karau na'in atu selu estragus/danu ne'ebé toos-na'in hetan. Taa mate karau, toos na'in prátika krime danu tanba taa mate ema nia karau. Enkuantu karau na'in iha responsabilidade sivil atu selu estragus ne'ebé toos na'in hetan.

Kestaun apalidu ba oan sira ne'ebé aman abandona, meritísimu ne'e hatan katak tuir kultura kuandu aman la tau-matan ona ba nia oan sira, inan mak iha direitu atu tau nia apalidu ba nia oan nia naran maibé tuir lei, inan-aman biolójia hotu-hotu iha direitu atu tau sira-nia naran apalidu ba oan sira. Tanba ne'e, bainhira iha aman ida mak abandona nia oan, husu atu apresenta keixa para prokuradór nune'e tribunal bele halo prosesu no obriga inan-aman atu tau-matan no fó alimentasaun ba oan sira.

Kestaun kona-ba sidadaun estranjeiru ne'ebé hela kleur iha Timor Lesta maibé to'o agora seidak bele hatan direitu ba sidadania, meritísimu Juis hatan katak tuir lei sidadania nian, ema estranjeiru ne'ebé nia feen ka la'en ema timor-oan ka ema estranjeiru ne'ebé hakarak husik nia nasaun no husu atu sai sidadaun timor, rekejitu sira preve ona iha lei sidadania nian hanesan pelumenus hela metin ona iha timor durante tinan 5, hatene lian ofisiál Timor nian ida no tuir izame sidadania nian no bainhira passa mak foin bele sai sidadaun Timor Leste.

Kestaun kona-ba maluk sira defisiénsia ne'ebé seidak iha kartaun eleitoral, Dignísimu Xefe Prokuradoria, Dr. Mateus hatan katak xefe suku ho nia konsellu tenke identifika ka husu tuir nia comunidade sira kona-ba kestaun ne'e, ema ho kondisaun defisiénsia hira mak seidak iha kartaun eleitoral. Xefe suku no membru konsellu suku iha obligasaun atu fasilita nia comunidade sira atu hetan kartaun eleitoral la'os husik deit.

Kestaun kona-ba aman abandona nia oan sira, xefe suku no membru konsellu suku sira bele akompañia labarik sira ne'e mai apresenta keixa iha Ministériu Públiku nune'e Ministériu Públiku hatama prosesu ba tribunál hodi obriga inan-aman sira atu tau-matan no fó alimentasaun oan sira.

Exelensia Coordenadora Defensoria, Dr. Calisto Tout, iha nia resposta ba kestaun karau tama ema seluk nia toos, husu atu la oho karau refere. Bainhira haree katak karau estraga tiha ai-horis balun, toos-na'in bele apresenta keixa iha Defensória Públiku nune'e Defensór halo mediasaun entre toos na'in no karau na'in. Se iha estragus maka karau na'in bele selu fali estragus ne'ebé toos nain hetan. Bainhira iha prosesu mediasaun mak la konsege hetan solusaun, defensoria sei reprezenta toos na'in halo petisaun no haruka ba tribunál atu tribunál bele tesi no obriga karau na'in selu estragus ne'ebé toos na'in hetan.

Partisipante iha semináriu ne'e mai husi xefe suku sira, delegadu/a sira, konsellu suku husi Suku Lalisuc no suku Naimeko husi Posto Administrativu Pante Makasar, Rejiaun Otónomu Oekusi.

Semináriu ne'e taka ho partisipante sira vizita tribunál no iha vizita ne'e partisipate sira hetan esplikasaun direta husi juis administadór, Dr. Hugo Pui kona-ba sala audénsia no seksaun sira iha tribunál.

Semináriu rejionál ne'e realiza ho fundus husi União Europeia, parseiru suporta CEPAD no semináriu ne'e organiza husi JSMP.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl